

槃。智論云。過去阿僧祇劫。有大樹林。多有鳥獸。野火來燒。三邊俱起。唯有一邊。而隔一水。眾獸窮逼。逃命無地。我於爾時。為大身鹿。以腳跨岸。令眾獸蹈背而過。皮肉盡壞。以慈悲力。忍之至死。最後一兔來。氣力已竭。自強努力。忍之令過。過已背折。墮水而死。前得度者。今諸弟子是。最後一兔。須跋陀羅是。此舉涅槃會中。最末度者。

△<sub>庚二</sub>總括。

此二句。修多羅示八種成就故。云何為八。謂二種受持成就故。二種白淨法門成就故。二種自利益行成就故。二種快說法門成就故。

次科八種者。開前初句為二。受持是能受。法門即所受。自利是所成益。快說是能成功。初後各四。無別異故。

△<sub>己四</sub>大總相功德。

大總相成就畢竟功德者。二八成就總故。如經。所應度者。皆已度訖故。

大總相中。即上二句。每句各四。舉此始末。攝盡中間。一化所度之機故。云二八等。即下經云。應可度者。若天上人間。皆悉已度是也。

△<sup>己五</sup>因果自相功德二<sup>庚一</sup>總示<sup>庚二</sup>牒釋。今初

因果自相成就畢竟功德者。有四種自相。一因自相。如經。娑羅雙樹間故。二因共果自相。如經。將入涅槃故。三總自相。如經。是時中夜故。四果自相。如經。寂然無聲故。

五因果中。初科謂。未滅為因。已滅為果。四句示相。各別無濫故。皆云自相。始往雙樹。涅槃之處。故云因相。將入涅槃者。涅槃會上。放光入定。臥牀示疾等。皆為示現入滅。將入是因。涅槃是果。故云因共果相。中夜是入滅之時。表住中道。二種中道。通含因果。故云總相。寂然無聲。正是入滅。故云果相。娑羅此翻堅固。以冬夏不改故。上枝相接。下根相連。一榮二枯。故云雙樹。準涅槃後分。林間縱廣。十二由旬。天人大眾。咸皆徧滿。經云。爾時世尊。於七寶牀。右脇而臥。頭枕北方。足指南方。面向西方。後背東方。娑羅樹林。四雙八隻。西方一雙。在如來前。東方一雙。在如來後。北方一雙。在如來首。南方一雙。在如來足。此則四方。各有一雙。至佛涅槃已。東西二雙。各合為一樹。南北二雙。各為一樹。垂覆寶牀。慘然變白如白鶴。枝葉華果。悉皆枯悴等。若三卷泥洹云。佛語阿難。汝可往娑羅林中。見有雙樹。孤在一處。洒掃其下。使令清淨。安處繩牀。令頭北首。此則兩向。止有一雙。以大本六卷。悉對大機。

大本兩譯·南本三十六卷·北本四十二卷。雙卷三卷。並是小教。大小二機。所見各異。今經但云雙樹。則教限可知矣。

△庚二牒釋。

於中總自相者。遠離二邊故。成就二種中道故。一者正覺中道。二者離正覺中道。是中。離正覺中道者。即果自相應知。此果有二種。一者自性無說。離念涅槃果。二者遠離覺觀涅槃果故。

一次科初釋總相。離二邊者。即外道凡夫。斷常二見。又云二乘住空。菩薩著有。佛皆離故。中道一體。在世入滅。故分二種。例如小教。有餘無餘。二種涅槃也。是中下。次釋果相。自性無說者。體離言詮故。說由念起。離念故無說。對經無聲也。遠離覺觀者。性非思慮故。覺觀是動。遠離故無動。對經寂然也。此之二句。探序如來。說經已後。即入涅槃。據文次第。合云於娑羅雙樹間。將入涅槃。為諸弟子。略說法要。乃至經末云。是我最後之所教誨。是時中夜。寂然無聲。若不爾者。豈得說經之後。都無結絕之詞。結集之家。祇於序中。備序始末故。正宗之後。更無流通。又雙林所說。通諸涅槃。欲顯此經。正當中夜。臨滅際說。故先序之。即後分云。爾時世尊。寢臥寶牀。於其中夜。入第四禪。寂然無聲。於是時頃。便般涅槃。又復論中。

科為果相。明二種涅槃。顯是如來入滅之相。人多不曉。或謂先寂定。後說法。或云於無記中。假名字說等。如是妄傳。深乖經旨。

△<sub>巳六</sub>分別總相功德。

分別總相成就畢竟功德者。分別人法。二位差別故。人位差別者。上首眷屬差別故。如經。為諸弟子故。法位差別者。世間出世間法等故。如經。略說法要故。

六分別總相者。人法是總相。各有二別。故云分別。人中如目連身子等。名為師首。名上首弟子。即諸上首。所有徒眾。名眷屬弟子。法中世出世者。如前已解。

△<sub>丙三</sub>修習世間功德分二。<sub>丁一</sub>結前標後。<sub>丁三</sub>牒文解釋。今初

已說序分。次說修習世間功德分。此功德有三種。一者修習對治邪業功德。二者修習對治止苦功德。三者修習對治煩惱功德。

第二分下。即入正宗。修習世間功德。下列三科。即是三道。今修對治。破此三道。離四趣苦。位在兩凡。故名世間。若論斷證。為道方便。聖道基本。則為出世功德矣。

△<sub>丁二</sub>牒文解釋三。<sub>戊一</sub>對治邪業。<sub>戊二</sub>對治止苦。<sub>戊三</sub>對治煩惱。初中二。<sub>巳二</sub>標章。<sub>巳三</sub>牒釋。

今初